



ILIDŽA

INFORMATIVNI BILTEN OPĆINE ILIDŽA
Ilidža • Decembar 2013. • Broj 122



**NAJBOLJI LIKOVNI
RADOVI UČENIKA
NA KALENDARU
OPĆINE ILIDŽA
ZA 2014. GODINU**



SVEČANA SJEDNICA OPĆINSKOG VIJEĆA

Budžet Općine Ilidža 21.550.000 KM



Općinsko vijeće Ilidža je na 12. redovnoj sjednici održanoj 26. decembra 2013. godine u Multifunktionalnoj sali donijelo Prijedlog Budžeta za 2014. godinu u iznosu 21.550.000 KM.

Najveći dio Budžeta planiran je za kapitalne projekte 6.280.000 KM, 600.000 KM za udruženje građana, 250.000 KM za kulturu, 300.000 KM za sport, 250.000 KM za obrazovanje, nauku i mlade. Kako je planirano, Budžet će se trošiti, između ostalog i za subvencije privatnim preduzećima i poduzetnicima 300.000 KM, subvencije javnim preduzećima 401.000 KM, za socijalne pomoći pojedincima 300.000 KM, vjerske objekte 250.000 KM. Imajući u vidu da je BiH zemlja u tranziciji da ima izraženu potrebu za provođenjem reformi poreznog sistema, jer je postojeći neadekvatan i neefikasan i nije kompatibilan sa rješenjima a i tendencijama EU, neophodno je stvoriti uslove da se reforme provedu na nivou BiH i entiteta, odnosno da oba nivoa postignu saglasnosti za

brzo provođenje reforme, tj. dogradnju postojećeg poreznog sistema. Smanjivanje javne potrošnje promjena strukture javnih rashoda, po ekonomskoj namjeni i izraženija fiskalna regulativa mogu biti poželjan okvir razvoja, jer smanjivanje javnih rashoda povećava investicije i podiže konkurentnost privrede. Javna rasprava o Nacrtu Budžeta je provedena u svim MZ, po principu teritorijalne povezanosti i svi zahtjevi za apliciranje u finansiranje iz budžeta Općine Ilidža za 2014. postoje u resornim službama. Općinsko vijeće donijelo je i Odluku o izvršenju Budžeta Općine Ilidža za 2014. godinu. Tom Odlukom uređuje se struktura prihoda i primitaka, rashoda i izdataka Budžeta Općine Ilidža za 2014. godinu, njegovo izvršavanje, prioriteta plaćanja, zaduživanje i finansijsko izvještavanje. Budžet izvršava Općinski načelnik u skladu sa zakonom i osigurava primjenu odluka.

Stipendije za 80 učenika i 163 talentovana studenta

Odluka o stipendiranju talentovanih učenika i studenata u akademskoj/školskoj 2013/2014. godini bila je na dnevnom redu 12. redovne sjednice Općinskog vijeća Ilidža. Mjesečni iznos stipendije za učenike i studente prve godine je 78 KM, a za studente (druge-šeste godine) kreće se u rasponu od 96 do 120 KM zavisno od rezultata postignutog u prethodnoj godini. Stipendije će se dodjeljivati deset mjeseci. Kriterije konkursa zadovoljili su 243, od toga 80 učenika i 163 studenta.

Stipendije za djecu slabijeg imovnog stanja

Općinsko vijeće donijelo je Odluku o stipendiranju učenika i studenata slabijeg imovnog stanja u školskoj/akademskoj 2013/14. Tom odlukom stipendije će dobiti 87, od toga 32 studenta i 55 učenika. Mjesečni iznos stipendije za učenike je 75 KM, a za studente 100 KM. Stipendije će se dodjeljivati 10 mjeseci.

Na redovnoj sjednici vijećnici su donijeli i Odluku o stipendiranju djece bez oba roditelja i djece bez roditeljskog staranja. Stipendirat će se 46, od toga 21 student, 8 učenika srednjih škola, te 17 učenika osnovnih škola. Učenicima osnovnih i srednjih škola dodjeljivat će se po 75 KM a po 100 KM studentima.



REDOVNA SJEDNICA OPĆINSKOG VIJEĆA

Prijedlog Odluke o pristupanju i usvajanju RP „Kovači“

Općinsko vijeće na 12. redovnoj sjednici donijelo je Prijedlog odluke o pristupanju i usvajanju RP „Kovači“.

Površina obuhvata iznosi 78,5 ha. Izradom plana nastojat će se nadopuniti postojeći sadržaji naselja u cilju poboljšanja kvaliteta življenja stanovnika, kao što je nadopuna sadržaja uslužnih djelatnosti i društvene infrastrukture, stanovanja u okviru prostornih mogućnosti a u saradnji sa općinskom službom i MZ-om.

Neophodno je u saradnji sa kantonalnim Zavodom za zaštitu kulturno-historijskog i prirodnog naslijeđa ustanoviti da li postoje vrijednosti naslijeđa kao i mjere očuvanja istog. Za potrebe ovog plana, između ostalog, potrebno je na osnovu uređenog korita rijeke Večerice kroz naselje Kovači i regulacije vodotoka prema Željeznici uraditi analizu uticaja velikih voda i na osnovu dobijenih rezultata utvrditi potrebne mjere zaštite od plavljenja na nivou idejnog rješenja. Okvirna sredstva za pripremu plana i izradu plana u iznosu 112.350.00 KM obezbijedit će Općina Ilidža kao nosilac pripreme, a stvarni troškovi će se utvrditi nakon provođenja tenderskih postupaka.

Usvojena Strategija prema mladima Općine Ilidža

Općinsko vijeće usvojilo je Strategiju prema mladima Općine Ilidža sa akcionim planom 2014-2016. Općina Ilidža Strategijom želi stvoriti sredinu koja će omogućiti kvalitetan život mlade populacije, ali i uticati da se mladi ljudi aktivno uključe u rješavanje svih društvenih problema i omogućiti im da predstave svoje kreativne ideje i podržati one koji doprinose unaprijeđenju života na ovim prostorima. Općina ne može promijeniti realnost u Bosni i Hercegovini, a ni u svojoj sredini preko noći jer ne postoje dovoljni finansijski, a ni ljudski resursi. Stoga je Općina pristupila sistematskom i planskom rješavanju problema i ispunjavanju potreba mladih, a najbolji načina za takav pristup je ova Strategija prema mladima. Mladi su uz druge subjekte bili svestrano uključeni u izradu ovog dokumenta i oni trebaju uzeti budućnost u svoje ruke, a Općina će im pomoći u tome. Strategija je urađena s ciljem da nađe svoju primjenu u roku za koji je predviđena. Provođenje strategije koja obuhvata sedam različitih oblasti djelovanja omogućuje svrsishodan pristup unaprijeđenju položaja mladih na području općine Ilidža. Kreiranje i razvoj omladinske politike Općine Ilidža temelji se na Zakonu o mladima Federacije Bosne i Hercegovine, preporukama relevantnih evropskih dokumenata i rezolucije o mladima Bosne i Hercegovine.

Prijedlozi akata o regulisanju imovinsko-pravnih odnosa

Vijeće je na sjednici usvojilo prijedlog akata o regulisanju imovinsko-pravnih odnosa i to prijedloge zaključaka o neprihvatanju ponuda sljedećih nosilaca prava korištenja: Krošnjar Slobodana i Zgodić Muhameda. Usvojen je prijedlog zaključka za obnovu postupka za Bećirović Sulejmana, te prijedlozi rješenja o rješavanju imovinsko-pravnih odnosa u svrhu legalizacije stambenih objekata po zahtjevima Božić Nenada, Spahić Ahmeta, Bičević Izeta i Mahire, Hadžić Nedima, Omerbegović Ramiza, Šabanović Envera, Džomba Emina, Turulja Idriza i Čengić Edina, kao i prijedlog rješenja o rješavanju imovinsko-pravnih odnosa u svrhu legalizacije poslovnog objekta po zahtjevu Ljubas Žarka i prijedlog rješenja u svrhu legalizacije stambeno-poslovnog objekta Talović Fele. Vijeće je usvojilo i prijedlog rješenja o davanju saglasnosti za otuđenje nedovršene zgrade zajedno sa zemljištem pod zgradom po zahtjevima Mijatović Đure i Šimunović Vitomira.



Izmjene i dopune odluke o priznanjima Općine Ilidža

Općinsko vijeće je na sjednici usvojilo Odluku o izmjenama i dopunama Odluke o priznanjima Općine Ilidža. Ovim izmjenama utvrđuju se priznanja Općine Ilidža koja se dodjeljuju pojedincima i kolektivima sa područja općine Ilidža za izuzetne uspjehe u razvoju privrednih i društvenih djelatnosti, kao i značajan doprinos u odbrani općine. Priznanja u smislu ove Odluke o izmjenama i dopunama su: Zlatna plaketa, Srebrna plaketa i Zahvalnica. Uz Zlatnu plaketu dodjeljuje se i novčana nagrada u iznosu 1.000 KM, a uz Srebrnu u iznosu od 500 KM. Izmjenama je proširen krug onih kojima se ne mogu dodjeljivati priznanja i to vijećnicima Općinskog vijeća Ilidža i članovima savjeta mjesnih zajednica u vrijeme trajanja mandata. O broju, vrsti i dobitnicima priznanja odlučuje Općinsko vijeće Ilidža.



REDOVNA SJEDNICA OPĆINSKOG VIJEĆA



Odluka o usvajanju i provođenju RP „Donji Kotorac“

Općinsko vijeće na 12. redovnoj sjednici donijelo je i Odluku o usvajanju i Odluku o provođenju RP „Donji Kotorac“. Veći dio teritorije obuhvaćene planom danas je angažovan za individualnu stambenu izgradnju. Planom se predviđa 251 nova parcela za izgradnju individualnih stambenih i stambeno-poslovnih objekata. Ukupna površina obuhvata 41.1 ha.

Informacija o ugroženosti od NUS-a i MES-a

Informacija o ugroženosti teritorije općine Ilidža od neeksplozivnih sredstava i minsko-eksplozivnih sredstava bila je jedna od tačaka dnevnog reda 12. redovne sjednice Općinskog vijeća održane 26. decembra u Multifunkcionalnoj sali. Kako se navodi u Informaciji minska polja, još uvijek se nalaze na teritoriji iznad preduzeća „Famos“, iznad kamenoloma Krupac, preko brda Smrdelj, do sela Jasen, preko Gušća do Vidovca- Straišta i sela Zoranovići.

U MZ Vrelo Bosne minska polja su iznad Vrela Bosne i dio Golog brda. U MZ Rakovica, zahvaćene su teritorije koje se nalaze na potezu Oštrik, Zenik, Vela, Kokoška, Batalovo brdo-Plješevac. Još uvijek na području naše općine ima puno rizičnih površina i potrebno je uložiti mnogo truda i sredstava da bi se ovaj problem riješio. Rizične površine svrstane su u tri kategorije: prvi prioritet obuhvata deminiranje objekta, infrastrukture i terena koji garantuju održiv povratak i rad, zatim deminiranje poljoprivrednog zemljišta, te deminiranje šumskih kompleksa. Na području općine Ilidže za deminiranje, kako stoji u Informaciji, ostaje još 5.000.000 kvadratnih metara, za što je potrebno obezbijediti oko 13.500.000 KM. Služba civilne zaštite će i u narednom periodu težiti da još bolje i kvalitetnije pristupio ovoj problematici kako bi sva područja bila pobrađena projektima i nastavio se uspješan proces deminiranje na području naše općine. Po pitanju deminiranja Općina Ilidža je u predhodnog ciklusu deminiranja bila jedna od uspješnijih općina u BiH u kojoj nije bilo ni jedne žrtve. U 2013. godini Općina Ilidža je iz Budžeta za ove namjene izdvojila 200.000 KM.

Program rada Općinskog vijeća za 2014. godinu

Vijeće je na sjednici usvojilo Program rada Općinskog vijeća Ilidža za 2014. godinu, kojim su utvrđeni zadaci i prijedlozi akata koje će Vijeće razmatrati u toku naredne godine, a koji proizilaze iz zakona, utvrđene politike i ekonomskog razvoja općine, kao i druga pitanja iz njegovog samoupravnog djelokruga.

Na dnevnom redu Općinskog vijeća na redovnim sjednicama tokom 2014. godine, pored budžeta naći će se i nacrti, prijedlozi odluka, informacije, izvještaji i drugi akti iz njegove nadležnosti.

Općinsko vijeće u 2014. godini planiralo je i održavnje jedne tematske sjednice na kojoj će se raspravljati o pružanju zdravstvenih usluga na području Općine Ilidža. Planirano je održavanje tri svečane sjednice u povodu obilježavanja 1. marta - Dana nezavisnosti Bosne i Hercegovine, 12. marta - Dana Općine Ilidža i 25. novembra - Dana državnosti Bosne i Hercegovine.

Pored utvrđenih tačaka u Programu rada Općinskog vijeća za 2014. godinu, Vijeće će donositi odluke i druge akte iz svoje nadležnosti na prijedlog Općinskog načelnika prema programu rada službi za upravu izvršne vlasti u njihovoj tekućoj djelatnosti, kao i na osnovu akata koje budu donosili nalezni organi Federacije BiH i kantona Sarajevo.

Informacija o uspjehu u učenju i vladanju

Vijećnici su primili k znanju i Informaciju o uspjehu u učenju i vladanju učenika osnovnih i srednjih škola na području općine Ilidža u školskoj 2012/2013. godini. U deset javnih obrazovnih ustanova nastavu je pohađalo 5.440 učenika u 251 odjeljenje, što je za 132 učenika i tri odjeljenja manje u odnosu na predhodu školsku godinu. Osnovnu muzičku školu pohađalo je 340 učenika u 31 odjeljenju, a „El-manar“ pohađalo je 186 učenika u deset odjeljenja. Vladanje učenika najdirektnije utiče na sveopći uspjeh u odgojno-obrazovnom procesu, a procenat učenika sa primjerenim vladanjem je 93. Analizirajući socijalnu kartu učenika, 415 učenik živi u nepotpunim porodicama, sedam učenika su bez oba roditelja, a 32 su kod staratelja, hranitelja ili usvojitelja. U stanju socijane potrebe su porodice 629 učenika. Kako se navodi u Informaciji uspjeh učenika u školskoj 2012/2013. godine je 4,33. U slobodne aktivnosti učenika bilo je uključeno 4.409, a realizovano je 9.272 časa, a u osnovnoj školi „El-Manar“, 372 učenika koji su imali 910 časova.

U Četvrtoj gimnaziji Ilidža u školskoj 2012/2013. nastavu je pohađalo 614 učenika raspoređenih u 24 odjeljenja. Odličnih je bilo 152, vrlo dobrih 310, dobrih 168, dovoljnih jedno, nedovoljnih četvero. Primjereno vladanje imalo je 490 učenika. U školsku 2013/2014. upisano je 534 učenika raspoređenih u 23 odjeljenja.

U Srednjoj tehničkoj školi grafičkih tehnologija, dizajna i multimedija Ilidža školske 2012/2013. godine nastavu je pohađalo 595 učenika u 21 odjeljenju.

Odličnih učenika je bilo 110, vrlo dobrih 253, dobrih 193, dovoljnih 26, nedovoljnih 12. Primjerno vladanje imalo je 411. U školskoj 2013/2014 upisao je 565 učenika.



Gradani kreirali Budžet

Nakon što je Općinsko vijeće Ilidža na sjednici održanoj 28. novembra utvrdilo Nacrt Budžeta Općine Ilidža za 2014. godinu u iznosu 21.550.000 KM, upućen je na javnu raspravu, tokom koje su svih 16 mjesnih zajednica organizovale zborove građana. Lokalno stanovništvo je na zborovima imalo priliku iznijeti svoje zahtjeve za realizaciju projekata sredstvima općinskog budžeta za 2014. godinu. Na svim javnim raspravama prisustvovao je i načelnik Općine Ilidža prof. dr. Senaid Memić, sa saradnicima.

U MZ Butmir građani su, između ostalog, tražili nastavak rekonstrukcije Aerodromske ulice, asfaltiranje u ulicama Lopate, Mlinska, Plavi put, Butmirska cesta od 251-283, nastavak regulacije nedovršenog dijela korita Tilave, kao i čišćenje korita Tilave od spoja sa MZ Donji Kotorac. Građani Donjeg Kotorca na zboru zatražili su da se dovrši započete aktivnosti oko usvajanja RP ovog naselja, da se uredi saobraćajnica u ulici Tuneli, trajno reguliše vodotok male Tilave, izgradi javna rasvjeta na potezu od ratnog tunela do Aerodromske ulice. Prioritet na zboru građana Sokolović-Kolonije je da se nastavi sa provedbeno planskom dokumentacijom u ulici Zeleni put, Hrasnička cesta, Seada Bublina, Igmanska cesta, Podigmanska, zatim nastavak radova na izgradnji saobraćajnice sa šetalištem na relaciji od mosta Alije Izetbegović-ratni most, nastavak radova na Hrasničkoj cesti, presvlačenje ulica novima slojem asfalta: Braće Bučan, Sestara Eličić, Džananove, Nihadije, Ferhat-paše Sokolovića, Jusufa Bublina, Bihorske, te asfaltiranje ulica Huseina Đoze do centralne džamije, Bjelašničke krak, dogradnja Pete osnovne škole, projektovanje i sanacija Doma 22. april, samo su neki od prioriteta koji su izneseni na zboru građana M Sokolović-Kolonija.

Izraditi projektnu dokumentaciju i realizovati projekat navodnjavanja sportskih terena u sklopu stadiona Famos, rekonstrukcija i asfaltiranje, kao i izgradnja kišnog kolektora i pješačkih staza u ulici Derviš paše Bajezidagića, proširenje i rekonstrukcija djela ulice Gaj, postavljanje video nadzora u ulici dr. Halid bega Hrasnice, samo su neki od prioriteta građana MZ Hrasnica I. U MZ Hrasnica II potrebna je izmjena i dopuna RP Hrasnica II, rekonstrukcija ulica Ejuba Sarajkića, Stari Kovači, dr. Halid bega Hrasnice, Ćamila Marića, 15. maj, rekonstrukcija vodovodne mreže u ulici Glavogodina, Stojčevac, zamjena vodovodnih cijevi na cijelom području MZ, a naročito u ulicama gdje se vrši rekonstrukcija saobraćajnica, rekonstrukcija mosta u ulici Stojčevac, izgradnja sportske plohe u ulici Stari Kovači, samo su neki od prioriteta građana ove MZ.

Građani MZ Centar tražili su izradu RP za naselje Pejton, proširenje parking prostora u naselju Pejton, završetak ulica Abdulaha ef. Kantamirije, rekonstrukcije ulice Gazi Hasan-paše, izgradnja kanalicione mreže u ulici Zaima Topčića od broja 5 do 33.

Građani MZ Lužani iznijeli su neke od prioriteta: izvršiti postavljanje sigurnosnih kamera-video nadzora u ulicama Samira Ćatovića Kobre-parking, Ramiza Jašara, Vinka Šamarlića, Krste Hegedušića, Četvrte viteške brigade, Hamze Čelenke, regulisanje saobraćajne signalizacije u užem području naselja, izgradnja autobuske stanice u ulici Ramiza Jašara.

Neki od zahtjeva građana MZ Vreoca su: rekonstrukcija ulice Vreoca, asfaltiranje ulice Blažujski drum, nastavak asfaltiranja Lužansko polje, izgradnja kanalizacione mreže u djelu ulice Blažujski drum, izgradnja sportske plohe, a u MZ Vrelo Bosne: rekonstrukcija ulice Plandište, postavljanje hor-



izontalne i vertikalne signalizacije ili izgradnja kružnog toka na raskršću magistralnog puta M -17 Plandište-Vrelo Bosne, te izgradnja autobuskih nadstrešnica na svim stajalištima.

Građani MZ Blažuj smatraju da u 2014. treba da se riješi sanacija ulice Mitrići, proširenje puteva od mosta do raskrsnice Remze Ahmetovića, asfaltiranje ulica Vlakovo, Rogaćići, Stara pruga, Plantaža, Nadosjek, izgradnja kanala za otpadne vode u ulici Mitrići, izgradnja vodovodne mreže u ulicama Kamenolom, Plantaže i Vidovci.

Asfaltiranje oštećenih djelova prilikom polaganja vodovodnih cijevi u ulicama: Stanjevac, Kakrinjski put, Šamin gaj, Česma, Bistrički put, započeti radove prema postojećem projektu izgradnje kanalizacione mreže, izgradnja sportskih terena sa ogradom u krugu škola, osvjetljenje igrališta iznad džamije, samo su neki od prioriteta građana iznesenih na zboru u MZ Rakovica.

U MZ Osjek na zboru građana izneseni su prijedlozi: pristupanje izrade, izmjene i dopuna RP za ulice Mekote, Gornji Osjek, Gaj brdo, Drage Filipovića, Hendekuša, Bratunačka cesta, Osječki put, rješavanje imovinsko-pravnih odnosa vezano za lokaciju trafostanice u ulici Drage Filipovića, izgradnja nove saobraćajnice po urađenom projektu od ulaza u Osjek prema novom mostu, projektovanje i izgradnja kanalizacione mreže u ulici Hendekuša, nastavak regulacije korita Zujevine.

Na zboru građana MZ Otes izneseni su zahtjevi: izgradnja izlaza za brzu cestu iz pravca Otesa prema Sarajevu, projektovanje zgrade osnovne škole, izgradnja vodovodne mreže u ulicama Terovića, Sastavci, Senada Fazlića i Čitlučka, asfaltiranje uz učešće građana, dogradnja javne rasvjete u ulicama Sastavci, Oteška, Senada Fazlića.

Građani MZ Stup iznijeli su: nastavak aktivnosti na izradi RP Azići, dopuna RP Energoinvest, pokretanje inicijative za izgradnju osnovne škole, regulisanje vodotoka Dobrinje, rekonstrukcija glavne ulice Ismeta Alajbegovića Šerbe, asfaltiranje ulica uz učešće građana, a MZ Stup II: izmjene i dopune RP Stup Nukleus, rekonstrukcija saobraćajnice u ulicama Dobrinjska, Lepenička 101, izgradnja kanalizacione mreže u dva kraka Kasindolske, nastavak izgradnje korita Dobrinje, izgradnja osnovne škole, proširenje prostora ambulante i uvođenej druge smjene.

Građani MZ Stupsko brdo istakli su: asfaltiranje ulica 18. Septembra i dio ulice Olivera Ibrahimovića, postavljanje i ugradnja semafora na raskrsnici ulica dr. Kasima Begića i Aleje Bosne Srebrne, postavljanje horizontalne i vertikalne signalizacije na cijelom području MZ, ležećih policajaca, izgradnja odvoda oborinskih voda sa saobraćajnica, te izgradnju nogometnog igrališta u krugu bivše kasarne u Nedžarićima, izgradnja dječijeg igrališta sa pratećim mobilijerom.



Općina Ilidža i Srebrenica potpisale Sporazum o saradnji

Načelnici općina Ilidža i Srebrenice, prof. dr. Senaid Memić i Camil Duraković, 17. decembra u prostorijama Općine Ilidža, potpisali su Sporazum o razumijevanju i saradnji.

Općina Ilidža će ovim sporazumom pružiti finansijsku podršku Srebrenici s ciljem promovisanja znanja, duha zajedništva i međusobnog pomaganja građana ove dvije općine.

„Iako je prošlo 17 godina od završetka rata, i dalje u Srebrenici ima mnogo problema sa kojima mi ne možemo sami da se izborimo. Zato nam je svaka pomoć dobrodošla pogotovo od Općine Ilidža u kojoj živi veliki broj izbjeglica iz istočne Bosne. Drago nam je što su u Općini Ilidža, prepoznali probleme naših građana i što će nam pomoći u realizaciji infrastrukturnih i drugih projekata i nadamo se da će sporazum u cjelosti biti implementiran“, rekao je Duraković.

Načelnik Općine Ilidža prof. dr. Senaid Memić je kazao da se Srebrenica ne mora spominjati samo u ratnom kontek-



stu, i 11. jula, već je se treba sjetiti i dok se raspodjeljuju sredstva u općini u toku čitave godine.

„Želimo donirati u obrazovanje, komunalne djelatnosti, ali i u kulturu, sport i sve drugo što će doprinjeti boljem i kvalitetnijem životu građana Srebrenice. Želimo, prije svega, da oni znaju da imaju prijatelje u Općini Ilidža na koje se mogu osloniti u svakoj situaciji. Ovdje smo bili jednoglasni, Vijeće, načelnik i građani“, istakao je Memić.

Započela realizacija Projekta poboljšanja poslovnog okruženja i konkurentnosti u Općini Ilidža

Međunarodna finansijska korporacija (IFC), članica Grupacije Svjetske banke i Općina Ilidža krajem novembra ove godine potpisali su Ugovor o saradnji u oblasti poboljšanja poslovnog okruženja na Ilidži.



Zajednički projekt, rezultat je opredjeljenja Općine Ilidža da aktivno učestvuje u postupku reforme administrativnih postupaka, zbog kvalitetnijeg pružanja usluga građanima i privrednim subjektima, unaprijeđenja uslova smanjenja rizika i troškova poslovanja. Prva obuka, sa radnom grupom, koju je imenovao općinski načelnik prof. dr. Senaid Memić, održana je 11. decembra u Multimedijalnoj sali Općine Ilidža.

Osnovni ciljevi Projekta su: smanjenje rizika i troškova poslovanja, čime bi se poboljšalo poslovno okruženje i povećala konkurentnost općine Ilidža, poboljšali uslovi za život građana kroz povećanja direktnih stranih investicija i povećanje izvoza, kao i unaprijeđenje uslova za poslovanje pravnih subjekata kroz pojednostavljenje administrativnih postupaka i kvalitetnije pružanje usluga.

Kako je rečeno na obuci, ovim projektom očekuje se smanjenje troškova u procesu dobijanja dozvola, odobrenja, saglasnosti, broja dokumenata i koraka potrebnih da se završe određene procedure, kao i smanjenje vremena potrebnog za rješavanje predmeta. Povećenje transparentnosti, predvidivosti i pouzdanosti procedura i informacija, te poboljšanje općinskih usluga i povećanje efikasnosti su također očekivani rezultati ovog projekta. IFC Projekat poboljšanja poslovnog okruženja u Općini Ilidža realizuje se uz pomoć Kraljevine Švedske.

Uručeni ugovori o stipendiranju učenika i studenata slabijeg imovnog stanja

Općinsko vijeće donijelo je Odluku o dodjeli stipendija učenicima srednjih škola Kantona Sarajevo i redovnim studentima visokoškolskih ustanova Univerziteta u Sarajevu slabijeg imovnog stanja u školskoj 2012/2013. godini. Na raspisani konkurs od prijavljenih 124 njih 87 je ispunjavalo kriterije konkursa koji su i ostvarili pravo na stipendiju.

Tim povodom u Multifunkcionalnoj sali Općine Ilidža 30. decembra 2013. godine svečano su uručeni ugovori za stipendiranje 87 učenika i studenata slabijeg imovnog stanja. Stipendije je dobilo 55 učenika u iznosu od 75 KM u trajanju od 10 mjeseci i 32 studenta u iznosu od 100 KM u trajanju od 10 mjeseci. Ugovore je uručila Sejda Topalović, pomoćnica načelnika za rad, socijalna pitanja, zdravstvo, izbjeglice i raseljena lica.



Prvi radni sastanak načelnika Memića i menadžera IFC-a Šahovića

Poboljšanje poslovnog okruženja i konkurentnosti u Općini Ilidža bila je tema prvog radnog sastanka načelnika Općine Ilidža prof. dr. Senaida Memića i menadžera ovog projekta, Međunarodne finansijske korporacija (IFC), članice Grupacije Svjetske banke, Tarika Šahovića, koji je održan 23. decembra 2013. godine u Općini Ilidža.

Zajednički projekt, rezultat je opredjeljenja Općine Ilidža da aktivno učestvuje u postupku reforme administrativnih postupaka, zbog kvalitetnijeg pružanja usluga građanima i privrednim subjektima, unaprijeđenja uslova smanjenja rizika i troškova poslovanja

„Općina Ilidža će provesti reformu administrativnih postupaka koje u svom radu primjenjuje administracija općine, usvojiti, izmjeniti ili dopuniti sve općinske propise čije usvajanje i izmjene budu preduslov za implementaciju usvojenih preporuka za unaprijeđenje administrativnih postupaka. Mi ćemo izraditi i uspostaviti registar administrativnih postupaka koji su u nadležnosti općine, a do 15. januara, predviđeno je da budu popunjeni svi obrasci za prijavu postupaka. Najbitnije je da će se pojednostaviti procedura za naše



građane i privrednike, odnosno da će se smanjiti troškovi za dobijanje dokumentacije“ izjavio je načelnik Općine Ilidža prof. dr. Senaid Memić.

„Nadamo se da će se ovaj projekat uspješno realizirati jer Općina Ilidža se pokazala kao dobar partner već sada. Projekat ide po planu i trajat će 12 mjeseci, a posebna pažnja će se posvetiti analizi rokova, taksi, naknada, obrazaca, informacija i dokumentacije za svaki od popisanih administrativnih postupaka koje provodi Općina Ilidža“, rekao je, između ostalog menadžer IFC-a Tarik Šahović.



Građani razgovarali s načelnikom

Načelnik Općine Ilidža prof. dr. Senaid Memić 24. decembra 2013. godine u Općini Ilidža primio je 40-tak građana, koji su se prijavili za razgovor s njim.

Osim načelnika prijemu su prisustvovali i njegovi pomoćnici. I ovog utorka, veliki broj građana došao je na razgovor, u želji da riješi širok spektar najraznovrsnijih problema.

Hakija, Meho i Šemso Selimić, došli su da zahvale načelniku koji im je pomogao u rješavanju njihovih problema.

Najveći broj izloženih pitanja odnosio se na legalizaciju objekata, nezaposlenost, socijalnu problematiku i djelokrug inspeksijskih poslova. Mnogi sugrađani došli su u namjeri da im se riješi i neko pitanje koje nije u nadležnosti načelnika.

Tokom ove godine 2013. godine, koristeći ovakvu formu razgovora, sa načelnikom, susrelo se oko 6.000 građana, sa ciljem neposrednog kontakta i pomoći u rješavanju mahom egzistencijalnih, ali i drugih problema.

Održana javna rasprava o Nacrtu Strategije razvoja lokalnih cesta

UMultifunkcionalnoj sali općine Ilidža 18. decembra 2013. godine održana je javna rasprava o Nacrtu Strategije razvoja lokalnih cesta općine Ilidža za period 2014-2024. Predstavnici Službe za razvoj, investicije i komunalne poslove prezentovali su Nacrt prisutnim iz mjesnih zajednica, ustanova i javnih preduzeća.

Pitanja predlagračima, najviše su se odnosila na uređenje cesta u MZ, pješačkih staza i saobraćajne signalizacije.

Podsjećamo, da svi zainteresovani građani mogli su u pisanoj formi dostaviti svoje primjedbe, prijedloge, mišljenja i sugestije Službi za razvoj, investicije i komunalne poslove putem Centra za pružanje usluga građanima Općine Ilidža do 28. decembra 2013. godine, kako bi bile uvrštene u Prijedlog Strategije razvoja lokalnih cesta.





Prijem za učenike čiji radovi krase kalendar Općine Ilidža

U Općini Ilidža 27. decembra 2013. godine upriličena je prezentacija općinskog kalendara za 2014. godinu na kojem su i ove godine štampani najljepši likovni radovi učenika osnovnih i srednjih škola. Prezentaciji su prisustvovali autori likovnih radova, kao i nastavnici likovne kulture.

Načelnik Općine Ilidža prof.dr. Senaid Memić čestitao je učenicima čiji se radovi nalaze na kalendaru, njihovim nastavnicima, te tom prilikom im uručio prigodne novčane nagrade.

„Vi ste naš ponos. Ne zaboravite nikad da ste vi stanovnici Ilidže, učenici škola sa naše Ilidže i gdje god budete predstavljali svoje umjetničke radove, nikad ne zaboravite predstaviti ljepote Ilidže. Trudite se i dalje, a ovo je samo skromni dar koji, nadam se, makar malo će vas usrećiti. Želim vam puno uspjeha u u životu i daljem radu“ dodao je, između ostalog, načelnik Memić.

Nejra Coković učenica je devetog razreda Šeste osnovne škole i jedna je od učenica čiji je rad odabran za općinski kalendar.

„Veoma sam sretna što je moj rad izabran. Uradila sam najbolje što sam znala, a crtala sam tri religiozna objekata na Ilidži“ dodala je Nejra Coković.

Emina Salčin, učenica sedmog razreda Druge osnovne škole, također je nagrađena, a njen rad stoji na kalendaru u mjesecu oktobru.

-Ponosna sam što je moj rad izabran. Nacrtala sam Veliku aleju, jer je to nešto što je prepoznatljivo na našoj



Ilidži i uvijek budi nove inspiracije u meni kad god prošetam. Ona jednostavno ima dušu“ kazala je Emina Salčin.

Rijad Jusupović, čiji je rad izabran na kalendaru za mart, rekao nam je da je nacrtao Vrelo Bosne i da mu mnogo znači nagrada.

„Nagrada će mi biti podstrek za dalji moj trud, koji je prepoznat“ dodao je Rijad Jusupović.

Nagrađeni autori likovnih radova koji krase kalendar Općine Ilidža za narednu godinu su: Rijad Džihic (Četvrta osnovna škola), Ismet Hodžić (Osma osnovna „Amer Čenanović“) Rijad Jusupović (Treća osnovna škola), Zahid Babaić (Srednja tehnička škola grafičkih tehnologija, dizajna i multimedija), Nejra Coković (Šesta osnovna škola), Imran Lučarević (Osnovna škola „El-Manar“) Ilma Husić (Deseta osnovna škola), Salih Ibrahimović (Prva osnovna škola), Saira Feriz (Sedma osnovna škola), Emina Salčin (Druga osnovna škola), Ajša Jašarević (Deveta osnovna škola) i Adna Duraković (Peta osnovna škola)

Položeno cvijeće ispred spomen-obilježja u Otesu

U organizaciji Zelenih beretki, Pokretača otpora i Prve samostalne brigade Stup, 4. decembra 2013. godine obilježen je Dan sjećanja na poginule borce Otesa.

Zajednička delegacija ovih udruženja položila je cvijeća na spomen-obilježju u Otesu. Prisutni su odali počast poginulim borcima i šehidima učenjem Fatihe i minutom šutnje.

„Okupili smo se kako bi se prisjetili naših poginulih sugrađana i da poručimo ujedno da oni nisu, niti će ikad biti zaboravljeni. Našim mladim generacijama uvijek moramo pričati historiju da se nikad ne zaboravi ono što se desilo“ kazao nam je Faik Višić, predstavnik Prve samostalne brigade.





Pomoć za ratnog vojnog invalida

Četrdesetpostotni ratni vojni invalid Senad Vejo, izbjeglica iz Foče, živi sam u neuslovnom i ruševnom objektu u Rakovici, bez struje, vode i osnovnih uslova za život. Jedino primanje mu je invalidnina u iznosu od 52,75 KM. Tim povodom predstavnici Općine Ilidža Sejda Topalović, pomoćnica načelnika za rad, socijalna pitanja, zdravstvo, izbjeglice i raseljena lica i Adis Mujezinović, sekretar mjesne zajednice Rakovica obišli su ovog socijalno ugroženog invalida i uručili mu u ime Općine paket sa osnovnim prehrambenim artiklima i pakete sa hranom i higijenskim sredstvima koje je obezbjedio Crveni križ općine Ilidža. Pored ove pomoći u hrani Općina Ilidža je Senadu do sada pomagala i novčano u više navrata.



Očišćeno korito Miljacke

U okviru preventivnih mjera zaštite od poplava završeno je čišćenje korita Miljacke, koja protiče kroz teritoriju Ilidže. Vrijednost ugovorenih radova je 43.323,34 KM, a izvođač radova bila je firma „Stambolić“ d. o. o.

Projekat je finansiralo Ministarstvo privrede Kantona Sarajevo uz nadzor Zavoda za izgradnju Kantona Sarajevo. Prema elaboratu firme "Sarajinžinjeri" d. o. o po kojem je rađeno uređenje korita Miljacke očišćeno je devet sprudova (nanosa) i izrađen je kameni nasip na dijelu obale koji do sada nije bio regulisan i koji je predstavljao opasnost od izlivanja rijeke kod ulice Luke do broja 16. Radovi su okončani 22. decembra 2013. godine.



Pomoć za porodicu Dedović

Halim Dedović izbjeglica iz Jeleča kod Foče nedavno je ostao bez supruge, a zbog bolesti srca nije u mogućnosti da radi. Samohrani je otac sa četvero maloljetne djece. Živi kao podstanar u Sokolović- Koloniji i jedina primanja su mu dječiji dodaci. Tim povodom, aktivisti Crvenog križa Općine Ilidža obišli su porodicu Dedović i uručili im peć na čvrsto gorivo, pakete sa hranom i higijenskim sredstvima i novogodišnje paketiće za djecu, te na taj način bar malo ublažili nevolje i tešku situaciju u kojoj se našala ova porodica.

„Dok je supruga bila živa, koja je bila zaposlena, moglo se živjeti kako tako. Poslije njene smrti sve se promijenilo, ostao sam sam sa četvero djece, bez primanja, bolestan i sad sam im ja i otac i majka, snalazimo se uz pomoć dobrih ljudi kao što su ovi iz Crvenog križa Ilidže“, kazao je ovaj samohrani otac.





U Hotelu Terme otvoren savremeni Kongresni centar

U Hotelu Terme svečano je otvoren Kongresni centar. Kongresni centar jedinstvenog dizajna predstavlja jedan od najmodernijih i najvećih objekata takve vrste u BiH, kapaciteta oko hiljadu mjesta s kompletnom audio i vizuelnom opremom za prezentacije, kabinama za simultano prevođenje i drugo.

Površina cijelog centra je 2.500 metara kvadratnih, a sastoji se od šest polivalentnih dvorana koji uz vrhunsku uslugu i opremu osiguravaju uslove za besprijekornu organizaciju najzahtjevnijih kongresa i konferencija.

Radi se o investiciji Hotelsko banjsko rekreativnog društva Hoteli Ilidža d.d. Ilidža u čijem sastavu posluje i hotel Terme.

Simboličnim presjecanjem vrpce novi Kongresni centar otvorili su član Predsjedništva BiH Bakir Izetbegović, premijer Kantona Sarajevo Suad Zeljković i direktor Hotela Ilidža Muamer Budnjo.

Tom prilikom naglašen je značaj otvaranja ovakvih objekata za daljnji razvoj turizma na ovom području i šire,



kao i za otvaranje novih radnih mjesta. Posebno je istaknuto da je kongresni turizam iznimno bitan segment turističke industrije koji doprinosi značajnijem prometu u ovoj privrednoj grani.

Prolongiran rok za završetak vrtića u Lužanima

Iako je rok za završetak obnove dijela vrtića u Lužanima bio novembar, on je prolongiran jer nedostaje novac. U Zavodu za izgradnju KS kako nam je kazala direktorica Ljiljana Pelidija dobili su obavijest da će federalno Ministarstvo obrazovanja izdvojiti 33.700 KM, a JU Djeca Sarajevo 26.000 KM kako bi se sanacija privela kraju.

„U objektu se trenutno ništa ne radi, a ja ne mogu dati nalog izvođaču da nastavi radove dok novac ne stigne na naš račun. Nadam se da će tih 60.000 KM biti dovoljno da radove završimo. Međutim, ne možemo ništa garantovati. Nikad se ne zna šta može nepredviđeno se desiti, a što će iziskivati dodatna sredstva“ rekla je Pelidija. Ona je dodala da je u objektu potrebno uraditi grijanje, podne obloge, struju, keramiku te ostale finale radove.



Izgradnja Hrasničke ceste

Nastavak izgradnje desne trake sa pješačkom stazom na saobraćajnici Ilidža-Hrasnica teče planiranom dinamikom. Nova dionica puta duga je 560 metara i prostire se od prve do druge raskrsnice u Sokolović-Koloniji, a radovi će koštati 1,2 miliona KM.

S obzirom na vrijednost projekta on je podijeljen u dvije faze.

Trenutno se radi prva faza od 380 metara koja bi trebala da se završi do kraja decembra, dok će izgradnja preostalog dijela trase uslijediti naredne godine. Za ove radove obezbijeđeno je 800.000 KM.

„Kako se rješavaju imovinsko-pravni odnosi tako se nastavlja i dalja izgradnja, naravno u obimu koji dozvoljavaju sadašnji vremenski uvjeti, a urađeno je više nego je planirano „ rekao nam je resorni pomoćnik načelnika Mirsad Čaušević.



U Općini Ilidža sklopljeno 514 brakova

Podaci Matičnog ureda Općine Ilidža ne potvrđuju tezu da je brak kao institucija u društvenoj krizi. Koliko ekonomska kriza na to utječe, trebali bi se pozabaviti stručnjaci iz socijalne psihologije, budući da je to tek pretpostavaka javnosti. Činjenica je, međutim, da će bračani partneri pamtiti 2013. godinu. Jedinima je ona donijela sretno vjenčanje, a drugima razvod.

„Prema podacima Službe za opću upravu u okviru koje je Matični ured i pružanje besplatne pravne pomoći u 2013 godini u Općini Ilidža sklopljeno je 514 brakova. Također, u ovoj godini sačinjeno je 73 tužbe za razvod braka, odnosno zahtjeva za sporazumni razvod braka i jedna tužba za poništenje braka“ rekla nam je Mirsada Hasečić, pomoćnica načelnika za opću upravu.

U 2013. pronađene 71 ručne bombe

U 2013. godini prijavljene, pronađene i uklonjene su 71 ručna bomba, šest tromblona, tri mine protivpješadijske, te dvije minobacačke granate 82 mm, jedno pancirno zrno 122 mm, jedna protivtenskovska mina, 15 komada municije 7,9 mm i 271 komad municije 7,62 mm. Zahvaljujući prijavama građana i saradnjom Službe civilne zaštite Općine Ilidža i Četvrte policijske uprave-Policijske stanice Ilidža navedena sredstva su bezbjedno uklonile Tim za uklanjanje mina Federalne uprave civilne zaštite.



Š.F „Butmir“ pobjednik Novogodišnjeg turnira

U organizaciji Kulturno-sportskog i rekreacionog centra Ilidža održan je 18. Novogodišnji turnir u malom fudbalu „Ilidža 2014“ za kategorije pionira i pjetlića. Prvo mjesto u kategoriji pionira osvojila je ekipa „Butmira“ druga je bila ekipa Škole fudbala „Piksi“ sa Pala, a treći Š.F „Hrid“.

U kategoriji pjetlića najbolja je bila Š.F „Butmir“, a drugo mjesto su osvojila djeca Š.F „Hrid.“ Najbolji strijelac turnira bio je Anel Čenanović sa 12 postignutih golova, a najbolji pjetlić Kerim Mehmedspahić. Najbolji golman je bio Nikola Lazarević (ŠF „Piksi“), a najbolji igrač Amon Rakić (FK „Hrid“)

Za pionire Butmira nastupali su: Alem Valjevčić, Alem Borčak, Edževud Muratović, Vedad Udovčić, Namik Hrustembegović, Abdulah Mehmedspahić, Kerim Muslić, Bakir Kapetanović, Arnes Junuzović, Ilhan Pljevljak, Sejo Šetkić, Belmin Tahirović, Almir Maksuti, Emel Tahirović, Kerim Mehmedspahić, Amer Čenanović i Anel Čenanović.

Trener ekipe je Nermin Ošijan Gera.

Kasni isplata dječijeg dodatka

Do 31. decembra 2013. godine nije isplaćen dječiji dodatak ni za novembar, a ni decembar. To nam je potvrdila pomoćnica načelnika za rad, socijalnu politiku, izbjegla i raseljena lica Općine Ilidža Sejda Topalović.

„Novčana naknada nije isplaćena ni ženama porodiljama koje su u stalnom radnom odnosu a niti ženama, koje su evidentirane u Zavodu za zapošljavanje, ni jednokratne pomoći za novorođenčad“, rekla nam je Topalović.

Prema informacijama koje smo dobili iz službe nemaju podatak kada će isplata početi, odnosno kada će resorno kantonalno ministarstvo prebaciti sredstva za isplatu.

„U toku 2013. godini našoj službi za jednokratnu novčanu pomoć obratilo se 1.627 osoba. Iz budžeta za te namjene isplaćeno je 410.000 KM“ dodala je Topalović.



Festival drame

U okviru projekta Dani teatarske umjetnosti KUD „Ekrem Mujkić“ je uspješno realizovalo Festival drame na Ilidži. Festival je otvoren premijerom predstave domaćina “Miris sevdaha”, 18. decembra 2013. godine u Domu kulture Butmir. Gosti festivala Dramski studio “Igman” iz Hadžića 20. decembra 2013. u Multimedijalnoj sali na Ilidži izveli su predstavu “Kokoška”, 21. decembra 2013. godine, “Gospođu ministarku” odigrali su mladi glumci iz Amaterskog pozorišta „Neretva“ Konjic, 22. decembra predstavu “U Sandžaku je moje srce” izveli su Dramski studio „Bosnia Folk“ Zenica. Istog dana na istom mjestu predstavu “Taj Sizif” izvela je „Pozorišna trupa“ Konjic. Domaćini, mlađa grupa Dramske sekcije KUD „Ekrem Mujkić“ 25. decembra u Multimedijalnoj sali na Ilidži zatvorili su festival sa predstavom “Goni vraga kraju”.

„Odziv građana, odnosno broj posjetilaca na ovim predstavama, je mnogo bolji nego prošle ili predprošle godine, kada smo počeli sa ovim projektom. Hvala Općini Ilidža na podršci u realizaciji ovog festivala i cjelokupnom



doprinosu u razvoju i prosperitetu našeg KUD-a. Zadovoljan sam reakcijom publike i svi komentari na izbor predstava su pozitivni, a mi već sada počinjemo sa pripremanjima da sljedeći festival bude još bogatiji repertoarom i da učesnici budu gosti iz susjednih država“ rekao nam je Habib Selmanović-Beli, direktor Festivala.



Turnir u kuglanju ilidžanskih osnovaca

Sportsko-rekreacijski klub „KRIS - KROS“ u saradnji sa JU Prva, Šesta i Osmo osnovna škola „Amer Čenanović“ realizovao je još jedan projekat finansiran iz budžeta Općine Ilidža „Turnir u kuglanju“, koji je održan 19. decembra 2013. godine u kuglani hotela „HOLLYWOOD“. Na turniru su učestvovali učenici šestih i sedmih razreda iz osam osnovnih škola sa područja općine Ilidža.

U ekipnom plasmanu prvo mjesto osvojila je ekipa Pete osnovne škole, drugo Devete i treće Osme osnovne škole „Amer Čenanović“. U pojedinačnoj konkurenciji u kategoriji djevojčica prvo mjesto osvojila je Aida Zijadić iz Pete osnovne škole, drugo Asya Bašić iz Osme osnovne škole „Amer Čenanović“ i treće Dženana Kustura iz Desete osnovne škole. Kod dječaka prvo mjesto osvojio je Amar Vreto iz Devete osnovne škole, drugo Haris Godinjak iz Prve i treće Samir Agić iz Šeste osnovne škole. Pobjednicima u pojedinačnoj konkurenciji dodijeljene su diplome i medalje, a za ukupan plasman najbolji su dobili plakete, diplome i zahvalnice.

Prva i Osmo osnovna škola „Amer Čenanović“ najbolje u košarci

KK Impuls je od 07. do 21. decembra 2013. godine uspješno realizovao projekat “STOP DROGAMA - MINI LIGA 2013”. Finalne utakmice Drugog općinskog takmičenja u košarci održano je 21. decembra u KSIRC Ilidža, na kojem su učestvovali učenici šest osnovnih škola.

Prva osnovna škola pobjednik je ovoga turnira u kategoriji djevojčica, drugo mjesto zauzela je Druga osnovna škola, a treće mjesto je Deveta osnovna škola.

Osmo osnovna škola “Amer Čenanović” pobjednik je u kategoriji dječaka, drugoplasirana je Prva osnovna škola, a treće mjesto Deveta osnovna škola. Nagrade su uručene svim učesnicima, za prva tri mjesta pehari i medalje, a za svu djecu i za fair play ekipe je uručen pehar.

Pokrovitelj ovog projekta je Općina Ilidža.





Paketići za djecu uposlenika Općine i RVI

Uz prigodnu predstavu, Općina Ilidža 27. decembra 2013. godine u Multifunktionalnoj sali upriličila je podjelu paketića.

Kao i svake godine, paketiće su dobila djeca uposlenika Općine i Udruženja RVI. Podijeljeno je 79 paketića sa slatkišima i igračkama, a mališani su uživali uz lutkarsku predstavu „Čarolija“.

U veoma šaljivoj predstavi kroz likove učitelja, djece, lutaka i Djeda Mraza, sa djecom se obrađivala prolaznost vremena, razlikovanje dobra i zla, laži i istine, s posebnim akcentom na opasnost upotrebe pirotehničkih sredstava.



Paketići i u Spjalici

Obrazovno-raznodni centar za mlade, Spjalica, upriličio je dodjelu novogodišnjih paketića za najmlađe članove tima. Deda Mraz je kao i svake godine posjetio Centar i izmamio osmijeh na lica dječaka i djevojčica. Neformalno druženje roditelja i djece je bilo, ne samo interesantno, nego i prigodan način da isprate još jednu godinu i požele jedni drugima sve najbolje u dolazećoj 2014.

Pored paketića koji su dodjeljeni mališanima, ali i onim velikima, bilo je tu dosta smjeha, igre, plesa i zabave.



RVI podijelili pakete za 150 djece

Udruženje ratnih vojnih invalida Općine Ilidža 29. decembra 2013. godine u prostorijama restorana RVI na Bazenima, organizovalo je podjelu novogodišnjih paketića za djecu svojih članova.

Esad Delić, predsjednik ovog udruženja, rekao je da su paketići obezbijeđeni od ličnih sredstava ratnih vojnih invalida i to za 150 djece, uzrasta do 10 godina.

„Želimo da ova, i sva djeca rastu okružena ljubavlju, a njihovim roditeljima da mogu da im priušte što sretnije djetinjstvo. Ovo je samo mali znak pažnje da nisu zaboravljena i da trebaju da se raduju Novoj godini i paketićima“ istakao je Delić.

Za što veseliju atmosferu tokom podjele paketića pobrinulo se KUD „Ekrem Mujkić.“





Imran Lučarević i Lejla Bulić najbolji strijelci

„Mali osnovci-veliki strijelci“ naziv je projekta Sportsko-rekreacijskog kluba „Kris-Kros“ održanog 4. decembra 2013. godine u atomskom skloništu u Lužanima.

Imran Lučarević iz Osnovne škole „El-manar“ najbolji je strijelac turnira, drugoplasirani je Benjamin Muminović iz Šeste osnovne škole, a treće mjesto osvojio je Anes Šabotić iz Sedme osnovne škole.

Lejla Bulić iz Sedme osnovne škole zauzela je prvo mjesto za djevojčice, druga je bila Elmedina Bećirević iz Osme osnovne škole „Amer Čenanović“, a treće je Ajla Guhdija iz Desete osnovne škole.

U ekipnom takmičenju najbolja je Šesta osnovna škola, drugoplasirana je Osnovna škola „El-manar“, a treće mjesto zauzela je Sedma osnovna škola.



BH Machina Dževad Poturak okončao karijeru

Najbolji bh. K-1 borac Dževad Poturak, poznat po nadimku BH Machine, 7. decembra 2013. u KSIRC Ilidža, se pred domaćom publikom oprostio od takmičarske karijere.

Na takmičenju „No Limit“ bh. šampion se borio s Belgijancem Mamadouam Keteom. Nakon 50 pobjeda širom svijeta, BH Machine je skinuo rukavicu s lijeve ruke i na centru ringa zvanično potvrdio da je stavio tačku na dvanaestogodišnju karijeru. Publika ga je srdačno pozdravila skandirajući njegovo ime. Dževad Poturak se odlučio na korak da završi sa K-1 karijerom zbog zdravstvenih problema, a uskoro bi trebao otići i na operaciju srca.

BH Machine se prvi put istakao kada je 2003. godine pobijedio Sinišu Puljka i osvojio WKA evropsko takmičenje. Bivši je evropski prvak WKA i K-1 Fighting Networka u Pragu 2007. godine. Od tada je učestvovao na 75 takmičenja širom svijeta. Imao je 50 pobjeda, 23 poraza, te jedan neriješen rezultat.

U uvodnim borbama nastupili su najbolji bh. K-1 borci protiv boraca iz regiona.

Četvrto prvenstvo u karateu

U organizaciji Karate kluba „Champion“ u KSIRC Ilidža, 14. decembra 2013. godine održano je Četvrto općinsko prvenstvo u karateu za djecu školskog uzrasta.

Na turniru je učestvovalo 260 takmičara iz šest klubova. Najuspješniji su bili KK Kapiten (Druga osnovna škola) osvojivši sedam zlatnih, šest srebrenih i 10 bronzanih medalja, zatim KK Champion „Fighteri“ (Prva osnovna škola) sedam zlatnih, šest srebrenih i četiri bronzane i KK Champion „Mačići“ (Sedma osnovna škola) kojima je pripalo sedam zlatnih, četiri srebrene i sedam bronzanih medalje.

Četvrti su bili KK Champion „Gladiatori“ (Peta osnovna škola) sa tri zlatne, pet srebrenih i sedam bronzanih, zatim KK „Olimp“ (KSC Stup) također tri zlatne, četiri srebrene i osam bronzanih medalja, a KK Champion „Vukovi“ (Treća osnovna škola) osvojili su pet zlatnih, četiri srebrene i četiri bronzane medalje. Pet zlatnih, četiri srebrene i dvije bronzane medalje osvojio je KK „Samuraj“, KK „Satori“, dvije zlatne, pet srebrenih i sedam bronzanih medalja, a KK „Zanshin“ četiri zlatne, dvije srebrene i tri bronzane medalje.

KK Champion „Zmajevi“ (Prva osnovna škola) uzeli su jednu zlatnu, dvije srebrene i četiri bronzane medalje, KK Champion „Crni vitezovi“ (Deseta osnovna škola) po jednu zlatnu, srebrnu i bronzanu medalju, te KK Champion „Tigrovi“ (Šesta osnovna škola) osvojili su tri bronzane medalje.





Raspjevana ilidžanska mladost

Ilove, kao i predhodnih godina pred novogodišnje praznike, 29. decembra 2013. godine u sali Multimedijalnog centra na Ilidži, a pod pokroviteljstvom Općine Ilidža, održan je Novogodišnji hit šou. Koncert je nastao kao ideja da mladi umjetnici svoj muzički talenat i želju za pjevanjem, a koji su se takmičili na Prvom, Drugom i Trećem muzičkom festivalu Djeca pjevaju hitove još jednom se predstave javnosti. Na koncertu je nastupilo 10 najuspješnijih takmičara sa muzičkih festivala Djeca pjevaju hitove i to: Inaya Duran, Isidora Ratković, Belma Muratović, Aida Poljo, Ajla Silajdžić, Martina Milos, Hana Hadžić, Ajla Mušanović, Mustafa Bidžan i Haris Bidžan. Svi izvođači predstavili su se publici sa po dvije ili tri pjesme. Gosti na koncertu bili su članovi muzičkog ansambala „Himna“ i plesna grupa „Pixie magic“. Organizator koncerta je bio Sportsko-rekreacijs-



ki klub „KRIS-KROS“ Ilidža u saradnji sa JU „Šesta osnovna škola“. Projekat je finansijski podržala Općina Ilidža sredstvima iz budžeta za mlade.

Mladi na kafi s Damirom Nikšićem

Spajalica je 17. decembra odzvanjala zdravim smijehom mladih ljudi koji su uživali u druženju sa poznatim bosanskohercegovačkim umjetnikom, Damirom Nikšićem. Već je prešlo u praksu da jednom mjesečno u ovom centru organiziraju druženja pod nazivom „Kafa sa...“ gdje im u posjetu dolaze uspješni, zanimljivi i pozitivni ljudi iz različitih životnih sfera. Tako su se mladi tog 17. decembra družili sa umjetnikom Damirom Nikšićem sa kojim su razgovarali o raznoraznim temama koje muče mlade ljude na ovim prostorima.

Pitanja o kreativnosti kod mladih, o obrazovnom sistemu, problem pasa lualica i eutanazije, kuda vodi



politički sistem BiH, komparacije socijalizma i kapitalizma, primjeri dobre prakse rješavanja društvenih problema iz nekih drugih, razvijenijih zemalja i sl. Damirov provokativan, direktan i „bez dlake na jeziku“ stav o trenutnim zbivanjima i problemima u državi svijetu je nasmijao do suza, te prikazao iste kroz jednu drugačiju percepciju, umjetničku. Bilo je to još jedno večer ispunjeno kvalitetnim sadržajem, dobrim društvom i pozitivnom energijom mladih ljudi koji su budućnost ove zemlje.

Postavljena izložba ručnih radova u Općini Ilidža

Uorganizaciji Udruženja „Zlatna ruka“ u prostorijama Općine Ilidža bila je postavljena izložba ručnih radova. Postavljena je bila 11. i 12. decembra 2013. godine, s ciljem prikupljanja sredstava za kupovinu novogodišnjih i božićnih paketića. Na izložbi su se mogle pronaći rukotvorine kao što su pletene i heklane tkanine i ručno izrađen nakit.





IN MEMORIAM

Općina Ilidža je 13. decembra ostala bez svoje uposlenice Aide Lušničkić.

Aida Lušničkić rođ. 1960. nakon teške bolesti preminula je 13. decembra 2013. godine. Smrt je zatekla na funkciji pomoćnika načelnika za obrazovanje kulturu sport i informisanje u Općini Ilidža (2007-2013). Bila je angažovana u organizaciji mnogobrojnih obrazovnih, kulturnih i sportskih manifestacija. Kolektiv će Aidu pamtiti po vedrini, optimizmu i nadasve velikom profesionalizmu. Njenim odlaskom Općina Ilidža izgubila je plemenitog čovjeka i vrijednog radnika. Najbliži će nastaviti svoj životni put uz najljepša sjećanja na njenu iskrenost, dobrotu i ljubav koju im je nesebično pružala.

Aida Lušničkić ukopana je na mezarju Kovači u Hrasnici 14. decembra 2013. godine.